

## 開放文學－歷代筆記－夷堅丁志 卷第八

華陽洞門 李大川·撫州人·以星禽術游江淮·政和間·至和州·值歲暮·不盤術·俚語謂坐肆賣術為鈎司·游市為盤術·正旦日·逆旅主人拉往近郊·見懸泉如簾·下入洞穴·甚可愛·因相攜登隴·觀水所注·其地少人行·陰苔滑足·李不覺隕墜·似兩食頃·乃坐於草壤上·肌膚不小損·睨穴中·正黑如夜·攀緣不能施力·分必死·試舉右手·空無所著·舉左手·即觸石壁·循而下·似有微徑可步·稍進漸明·右邊石池·荷花方爛熳·雖饑渴交攻·而花與水皆不可及·已而明甚·前遇雙石洞門·欲從右入·恐益遠·乃由左戶而過·如是者三·則在大河中·花水亦絕·了不通天日·而晃曜勝人間·中有石棋局·聞誦經聲·不見人·遠望若有坐而理髮者·近則無所睹·俄抵一大林·陰森慘澹·淒神寒骨·怖悸疾走·已出曠野間·舉頭見日·自喜再生·始緩行·逢道傍僧寺·憩於門·僧出問故·皆大驚·爭究其說·李曰·與我一杯水·徐當言之·便延入寺具飯·悉道所歷·僧歎曰·相傳茲山有洞·是華陽洞後門·然素無至者·李問此何處·曰·滌州境·今日是何朝·曰·人日也·李曰·吾已墜七日·財如一晷耳·僧率眾挾兵刃·邀李尋故蹊·但怪惡種種·不容復進·李還和州·訪舊館·到已暮夜扣戶·主人問為誰·以姓名對·舉室唾罵曰·不祥不祥·李大聲呼曰·我非鬼也·何得爾·遂啟戶·留數日而歸·每為人話其事·或謂之曰·爾亦愚人·正旦荷花發·詎非仙境乎·且雙石洞門·安知右之遠而左可出也·李曰·方以死為慮·豈暇念此·後雖悔之何益·李有子·今在臨川·陳鏐說·聞之大川·雷擊王四

臨川縣後溪民王四·事父不孝·常加毆擊·父欲訴於官·每為族人勸止·幹道六年六月·又如是·父不勝忿·走詣縣自列·王四者持二百錢·遮道與之·曰·以是為投狀費·蓋言其無所畏懼也·父行未半里·大雷雨忽作·急避於旁舍·雨止而出·聞惡子已震死·趨視之·二百錢乃在其脅下皮內·與血肉相連·父探懷中所攜·已失矣·

### 南豐雷媪

南豐縣採錄黃仲家·因大雨·墮雷媪於廷·擾擾東西·蒼黃失措·發茁然赤色甚短·兩足但三指·大略皆如人形·良久雲氣門暗·震電閃爍·遂去不見·

### 泥中人跡

撫州村落間·一夕雷雨·居民聞空中數百人·同時大笑·明旦·大木一本·連根皆拔出·其旁泥內·印巨人跡絕偉·腰臂痕入地尺餘·足長二尺·闊稱之·疑神物盡力拔樹·遇滑而蹶·故眾共笑之雲·

### 宜黃人相船

宜黃人多能相船·但父子相傳眼訣·而無所謂占書之類·幹道五年·縣民莫寅·造大艦成·以大錢邀善術者視之·曰·此為雌船·而體得雄·一板如矛·嶄焉居中·其相既成·在法當凶·官事且起·災於主翁·寅欲改更之·曰·禍福已定·不可為也·寅持錢三百萬·將買鹽淮東·適州需船載上供錢·拘以往·至大孤山下·桅檣為風所折·倉卒無可買·伐岸傍杉為之·人或言此神樹·不暇恤·是夕·滿船聞奇響震厲·莫測所以然·既過丹陽·盜夜入船·諦觀之·若甲士數十輩往來者·寅家藏古刀累世矣·近年遇夜後光彩發見·訝其異·取以自隨·乃攜此刀徑趨前·問值一人熟睡·手橫腹上·奮刀連斲之·斷其右臂·救至得不死·蓋部綱官劉尉也·初·劉生以寅解事有膽·故處其舟中·元未嘗有纖介之隙·寅殊不知·覺遂就擒·鞠於鎮江獄·府官欲論以死·而劉尉持不肯·曰·固他生宿冤耳·非今世事·吾倖存餘生·何必處以極典·遂用疑獄奏讞·得減死·黥隸邵武軍·

### 頰瘤巨蟲

臨川人有瘤生頰間·癢不復可忍·每以火烘炙·則差止·已而復然·極以患苦·醫者告之曰·此真蟲癩也·當剖而出之·取油紙圍項上·然後施砭·瘤才破·小蟲湧出無數·最後一白一黑兩大蟲·皆如豆·殼中空空無血·乃與頰了不相干·略無癢痕·但瘤所障處正白爾·

### 胡道士

胡五者·宜黃細民·每鄉社聚戲·作研鼓時·則為道士·故目為胡道士·以煮螺螄為業·必先揭其甲·然後烹之·及臥病·自舉右手一指·曰·一螺在此·遂以針剔去其爪·流血被掌·呼叫稱痛·少焉又剔其次者·至並足甲皆盡·乃死·

### 趙監廟

建昌寄居趙監廟·素有羸疾·或教之曰·服鹿血則愈·趙買鹿三四頭·日取一枚·以長鐵管插入其肉間·少頃·血凝滿管中·乃服·鹿日受此苦·血盡而死·趙果膚革充盛·健飲啖而所服既多矣·晚得疾·遍體生異瘡·陷肉成竅·癢無以喻·必以竹管立瘡中·注沸湯灌之·癢方息·終日不暫寧·兩月而卒·

### 亂漢道人

乙志所載陽大明遇人呵石成紫金事·予於起居注得之·今又得南康尉陳世材所記·微有不同而甚詳·故復書於此·大明者·南康縣程龍裡士人·父喪廬墓次·其明年歲在壬戌·乙志作癸亥·七月七日·晨興·有道人從山下來·陽時與學童三四人處·一僕執炊·荒山寂寞·左右前後十里間·絕無人居·扳緣蘿蔓·乃得到·正無可與語·見客來·喜而迎之坐·客曰·子八月當有厄·服吾藥可免·取腰間小瓢出藥一粒·令以水吞·且曰·吾有求於子·其許我乎·曰·何求·客指架上布衫·曰·以此見與·陽欲許而頗疑其偽·未即與·請至再·不得已付之·客卷納瓢中·瓢口僅容指·陽雖怪佞·然默念豈幻我歟·既而言吾豈真欲衫·聊相試耳·便能見贈·為可嘉也·探瓢出還之·索碗水置藥末一撮·撥旋久之·成紅丸如彈·揖陽曰·能服此否·陽曰·身幸無病·不願服·客即自吞之·徐徐語曰·子久此·當窘用·吾有遺於子·呼學童掬塊土·大如拳·握而噓之者三·顧陽曰·意吾手中何物·曰·不知也·置諸幾·則爛然金一塊·歷歷有五指痕·曰·可收此以助晨昏之費·蓋陽母尚存·陽方知為異人·尚疑其以財利嘗試我·拒弗受·客笑擲之地·引腳蹴之·遂成頑石·起辭去·留與飲·不可·漫指壁間詩·謂曰·此皆諸公見寄者·願得先生一篇如何·客曰·子欲詩可矣·取案上禿筆·就地拂數四·蘸碗水中·大書於壁·略無丹墨之跡·殊不可辨·既送之下山·回視已若淡紫色·其詩云·陽君真確士·孝行洞穹壤·皇上憐其艱·七夕遣回往·逡巡樂頑石·遺子為饋享·子既不我受·吾亦不汝強·風埃難少留·願子志勿爽·會當首鼠記·青雲看反掌·前題亂漢道人四字·字徑四寸許·俄又加赤色·正如赤土所書·明日·遍詢村民·皆莫見所謂道人者·鄉之士共以告縣·縣告郡·郡聞於朝·賜束帛·後五年·世材自福州來為尉·親見陽談始末如此·訪程龍之廬·草屋推頰·他詩悉剝落·獨道人者灑然如新·詩中雲遣回往·疑必呂洞賓雲·陽廬父墓終喪·母繼亡·亦(原闕十二行)

### 和旨樓缺

#### 內文缺

### 吳僧伽

吳僧伽·贛州信豐縣僧文祐·本姓吳·落髮出遊·結庵於贛縣·嶺·久而去之·客雲都淨寺之僧伽院中·遂主院事·故因目為吳僧伽·佯狂市廛·人莫能測·每日必詣松林以扣之·曰·趙家天子趙家王·不曉其意·逢善人於涂·輒拱揖致敬·貪暴不仁者·率抵以狗彘·不少屈·惡少年不樂·至群輩噪逐之·嘗走避於某家園竹中·疾呼求救·且拊其竹曰·大大竹林成掃帚·不旬浹·萬竹悉枯·此家固一凶族·自是衰替·寺後竹叢·一竿最巨·忽夜至·造其下·考擊而歌·聲徹四遠·連夕如是·他僧為之廢寢·怒而伐之·既而紫芝徑尺生·上·邑民曾德泰·老無子·與妻議飯吳以祈·未及召·且而排闥來·曾大驚·謹饋之食·將去·曰·當何為報·唯有二珠而已·果連生二子·縣市舊集於南洲·而縣治外但曠野·吳過門必言曰·錢將平腰矣·及洲沒於水·市遂徙於邑

門之陽·嘗求菜於民婦·戒使多為具·婦許諾·夫歸怒其妄費·吳至乞醯·生啖之·若欲輟而噎食者再三·婦曰·食飽則已·何必盡·曰·欲免汝夫婦責言耳·民駭謝·學佛者孫德俊·往汀州武平·謁慶岩定應師·師曰·爾於川自有佛·禮我何為·孫曰·佛為誰·曰·吾法弟僧伽也·為吾持一扇寄之·舟檣岸·吳已至·曰·我師寄扇何在·孫以汀扇數十雜示之·徑取本物而去·由是狂名日減·多稱為生佛·一夕·遍詣同寺諸刹門·鋪坐具作禮·曰·珍重珍重·皆寂無應者·中夕·趺坐而逝·時大中祥符己酉六月六日也·是日·邑大商在蜀·遇之於河梁·問吳僧何往·痾僕急趨曰·少乾少乾·商歸·乃知其亡·其亡也·異香滿室·數日不變·僉議勿火化·而望其全體事之·元豐乙丑冬·一僧來郡城·訪桂安雅家·求木作龕·桂曰·師為何人·曰·爾於都妙淨寺明覺院吳僧也·桂許之·送之逾闕·遂不見·後乃審其故云·明覺即僧伽也·真身至今存·

何丞相

何文鎮丞相·初自仙井來京師·過梓潼·欲謁張王廟而忘之·行十里始覺·亟下馬·還望默禱再拜·是夕夢入廟廷·神坐簾中·投文書一軸於外·發視之·全類世間告命·亦有詞語·覺而記其三句雲·朕臨軒策士·得十人者·今汝然為舉首·後結銜具所授官·何公思之·廷試所取·無慮五百·而言十人·殆以是戲我也·及唱第果魁多士·第一甲元放九人·既而傳崧卿以省元升甲·遂足十數·蓋夢中指言第一甲也·所得官正同·葉石林書此·

鼎州汲婦

鼎州開元寺·多寓客·數客同坐寺門·見婦人汲水·一客善幻術·戲惱之·即挈水不動·不知彼婦蓋自能幻也·顧而言曰·諸君勿相戲·客不對·有頃曰·若是·須校法乃可·擲其擔化為小蛇·客探懷取塊粉·急畫地作二十餘圈·而立其中·蛇至不能入·婦人含水噴之·稍大於前·又狠言官人莫相戲·客固自若·蛇突入直抵十五圈中·再噴水叱之·遂大如椽·徑躡中圈·將向客·婦又相喻止·客猶不聽·蛇即從其足纏繞至項·不可解·路人聚觀且數百·同寺者欲走訴於官·婦笑曰·無傷也·引手取蛇投之地·依然一擔耳·笑謂客曰·汝術未盡善·何敢然·若值他人·汝必死·客再拜悔謝·因隨詣其家為弟子雲·

瑞雲雀